

四庫全書

集部

欽定四庫全書

石倉歷代詩選卷一百六十

明 曹學佺 編

宋詩三十七

楊時

送富朝奉還闕

君不見慶厯承平道如砥
馳車八荒同一軌
敵人鴟張怒螳臂
百萬雲屯若封豕
又不見朔方橫流漲天起
腐

麥蛾飛木生耳扶攜道路雜老幼操瓢溝中半為鬼關
河日夜刁斗驚嫚書乘駟來渝平兵間持節得英傑談
笑坐使羈長纓青社環城萬區屋發廩分曹具饘粥飢
羸枯頰陡生光叢塚不聞新鬼哭臧孫有後天匪親問
門容車何足論竭來灘上見猶子雄姿宛有典刑存驂
騑已度渥洼水朝燕暮越應千里行看玉勒駕鑾輿濯
足瑤池從此始

南康值雨

平沙漲雪清江濱
水花照日紅生鱗
軒然五老出城表
雕玉萬仞窺長身
雲巾星弁覆華頂
飛泉漱瀑垂天紳
平生未識廬山面
碧巘橫雲望中見
江頭一尺雨銜天
奔浪號風作悲健
朝來淤泥沒牛馬
咫尺坐論千里遠
芒鞋拄杖挂塵屋
神馬尻輪歟飛轉
卧龍庵前碧眼翁
日飲山渌殮溪松
神融氣合八荒外
此心炯炯宜先通
未須勒移却俗駕
會應一洗塵寰空
寄言歸侍壺丘子
他日來遊當御風

遊武夷

函關崎嶇走秦鹿天下並逐爭羣雄扶雲翻空鼇足折
黔黎竄伏如寒蛩武夷山深水清泚避世猶有高人蹤
龍泓東注海波涌玉女翠擁秋雲鬆赤霄真骨寫虛壁
通泉凡筆慙非工藏舟浮梁跨絕壑隱見似與天潢通
當時雞犬不復見窠巖依舊煙霞籠我來秋杪月既望
尚有幽菊埋榛叢天容洗淨雨新霽雲幕四卷清無風
掀篷進棹窮異境注目想見流殘紅回船杖屨躡幽徑

松竹窈窕環琳宮自憐病骨挂塵網幔亭高會何由逢
解衣歸卧玉瑣碎仰看明月穿疎篷

向和卿覽余詩見贈次韻奉酬

杜陵頭白長昏昏海圖舊繡冬不溫更遭惡卧布衾裂
盡室受凍憂黎元詩人窮愁自古爾豈若種藝依青門
嗟余老懶世不用窮巷久雨無高軒蟲鳴鳥噪感時節
髮不恤緯羞前言殘章斷簡棄不錄自愧潢潦無根源
君胡袞字富褒飾三復妙語將誰論知君獨負青雲器

欲使飢者名長存

岳陽書事

洞庭水落洲渚出疊翠疏峯遠煙沒重樓百尺壓高城
畫棟沈沈倚天闕湖光上下天水融中以日月分西東
氣凌雲夢吞八九欲與溟渤爭雌雄澄瀾無風雨新霽
一日萬頃磨青銅瑠璃夜影貯星漢騎鯨已在銀河中
湘妃帝子昔何許但有林壑青浮空蒼梧雲深不可見
遺恨千古嗟何窮須臾晦冥忽異色風怒濤翻際天黑

乘陵瀨壑走魑魅
淳漓百怪誰能測
忽看舟子玩行險
更欲飛帆借風力
安得晴雲萬里開
依舊寒光浸虛碧

寄游定夫

憶昨相逢鳳山址
駒隙駸駸餘半紀
君趨烏府近清光
陸海驚濤漲天起
雲帆大舸半摧溺
艤岸得全誠偶爾
我時捧檄赴京渚
放浪江湖一浮蟻
談書考古老無用
哺啜糟醅咀糠粃
東歸雖復有民社
為米折腰良可耻
市朝紛紛真羿穀
朔幹燕弧不容擬
投身中地竟誰免

未信棘端能捍矢重樓百尺卧玄德問舍求田不須鄙
早歲結鄰初有約齒豁頭童今老矣築田預想傍田廬
負耒耦耕何日始

寄范正甫

羈窮莫厭如牢圈從古功名出屠販男兒不負懸弧心
馬革裹尸猶足願君不見淮陰寄食飢貧叟胯下英風
亦何有逢時吐氣雷電奔金印纍纍大如斗玉門晝夜
羽檄驚睥睨欲塹天都城叩關虎士鬱餘怒科頭奮戟

如鵬鷹君從壯年蘊奇策未宜縮首藏柴荆昔人投筆
真豪杰慨然萬里終成名南山白額雖欲老百獸遭之
猶裂腦

吳子正招飲時權酒局不赴作詩戲之

寒爐火冷浮青煙勁風刮面如戈鋌凝陰不動天欲雪
竟日兀兀成拘攣廣文才名四十年天寒坐客猶無羶
參軍官小技能薄寂寞冷坐誠宜然忘形杜老偶相覓
傳呼歌舞開華筵嗟余簡書固可畏不得對飲簷花前

謾有糟漿逆人鼻汝陽口角空流涎可能更似蘇司業
只與時時送酒錢

晚雨

斷霞明滅天日黥雨意晴暉爭好醜浮雲冉冉無定姿
白衣忽變如蒼狗悲風激烈河漢翻雨脚如麻飛霰寒
山深氣腥豺虎亂乾坤四合誰云寬將溪野客懶成癖
怯寒手攣面如墨把盃強吞僵立歌閉門獨愁天已黑

離家作二首

敗葉辭故枝驚飈送微雨田廬向收穫城中亟完補遊
子欲何之道路修且阻俛首謝田叟余生厭羈旅
胡雁依朔風羣飛逐南翔遊子方北征朔風吹我裳攬
轡望雲間夜色正蒼蒼空羨南歸翼幽懷增感傷

別游定夫

黽勉吾將仕謀身力已分漆雕慙未信卜子歎離羣慘
淡交情重間關道路勤至言宜遠寄孤陋願頻聞

雨寒

天幕陰雲積蕭蕭雨正靈泥汙關市寂水入御溝深破
屋寒侵骨哀絃凍絕音更愁風力健瘦怯不能禁

歸雁

天末驚風急江湖夜思長悲鳴愁絕塞接翼冒清霜澤
岸多繒弋雲間乏稻粱茫然栖息地飲啄欲何傷

感事

世事浮雲薄勞生一夢長散材依櫟社幽意慕濠梁風
急鷹鷂迅霜殘草木黃投閒如有約早晚問耕桑

偶成

天遠何須問勞生聽若何犁鋤三畝足
栖息一枝多
白雪寧堪冒清時只浪過好尋明月影
醉舞自婆娑

除夜感懷

歲律俄云盡思家日日深二年為客恨
千里倚門心
節物羅樽俎兒童學語音眩然如在目
恍惚夢難尋

其二

愛日非余願親顏長在心遠遊仍換歲
華髮已盈簪
永

夜誰同席殘盃憶共斟相思空有淚揮洒滿衣襟

泛江至土坊

萬頃江湖遠孤乘一葉船雁飛雲外字蓬掩水中天波
靜櫓聲息風強帆影偏回環聊注目浩蕩接青煙

秋日有懷寄從弟表民

羈旅吾方困哀思汝正煩望雲愁雁序回首憶鵲原北
圃疏還盛東軒菊正繁飄零不相見沾灑獨忘言

又用前韻和早梅

楚國春歸早寒梅處處開月和清艷宿天與靚粧來東
閣詩懷動南枝歲律回蕭然冰雪態無處覓輕埃

出京

旅泊驚秋意塵沙變客衣明星爛河漢殘月暗簾帷風
柳斜斜轉雲帆片片飛窮愁添別病衰晚意多違

言溪早起

短日催征轡聽雞踏曉霜遠山頻入望薄酒謾搜腸湘
浦蓴絲滑吳松鱸縷長何時一疎放把釣卧滄浪

漢坂舟行

曲岸通幽徑疎籬映竹斜
塢深藏吠犬林薄露人家
石瀨魚偏美鄰村酒易賒
祇應雲水富自足一生涯

湘君祠

鳥鼠荒庭暮秋花覆短牆
蒼梧雲不斷湘水意何長
澤岸蒹葭綠籬根草樹黃
蕭蕭竹間淚千古一悲傷

哀鴻

哀鴻常苦飢悲鳴垂其翼
朔漠曉霜寒江湖晚煙冪
乾

坤一網罟高飛亦何益日暮無與羣驚風暗沙磧

穎昌西湖泛舟

春過鶯花無處尋移舟行近古城陰寒衣水上收殘片
傾耳枝間覓好音山隔曲堤迷遠近魚跳文藻亂浮沈
飄然自得江湖趣陡起歸興萬里心

送丁季深

煙含疎柳綠蒙茸杏頰桃英入眼紅邂逅與君逢臘雪
飄零獨我過春風空愁轉轂音塵遠且寄離懷笑語中

後夜月明人寂寂相思那復一樽同

蘄州早起

城頭雷動角聲哀似共行人怨落梅
欲報晨炊梁未熟喚回殘夢眼慵開
霜清暗覺貂裘冷月淡空令犬吠猜
倚杖起肩風正烈不堪嘶馬重徘徊

遊玉華洞

蒼藤秀木遶空庭疊石層巒擁畫屏
混沌鑿開幽竅遠巨靈分破兩峯青
雲藏野色春長在風入衣襟酒易醒

採玉遺蹤無處問擬投簪紱學仙經

和張倅行縣

江浮疊嶽弄清輝雲外冥鴻江上歸擊目自多幽興在
揮毫時見彩箋飛應愁零雨侵星駕好為援戈却晚暉
帝室正須調鼎鼐北山為語不須譏

寄長沙簿孫昭遠

陽城衰晚拙催科閭寢空慙罪亦多祭竈請憐君自適
載醪祛惑我誰過猗猗庭有蘭堪佩寂寂門無雀可羅

歸去好尋溪上侶為投纓紱換漁蓑

席上別蔡安禮

故里相看眼暫明一尊聊此話平生杜陵蚤被微官縛
元亮今為世網撻長路關山吾北去春風梅嶺子南征
結隣莫負當時約早晚滄浪共濯纓

汴上

天上行雲曳白衣半銜晴日在林扉盤花落雁驚還起
啄食飢鳥趁不飛榆筴青錢飄已盡月堤流水潁相圍

征途處處塵隨眼多病長年與世違

荊州書事

千里瀕江地可毛結廬何必故山椒
載醪不過斜川路
飲水誰同陋巷瓢
勿問雞蟲間得失
但知鵬鷃各逍遙
黃塵滿眼僧窓靜
坐對風花意已消

直舍大風書事寄循道

枕書無寐首空搔
萬竅噓風正怒號
雪意浮空迷遠目
月林梳影見秋毫
幽庭所藉惟荒草
妙理應須付濁醪

誰念維舟江上客落帆千里壓雲濤

春日有懷諸友

憑几無聊晝掩扉
芬芬晴氣減春衣
隔簾掩映鶯初語
背日連翩雁北歸
莫逆交遊千里別
遠來音信兩年稀
追尋舊事成幽夢
觸物心傷事事非

南歸書事

浪漫人間壓客塵
衡門長憶鎖榆枌
忘言擬盡輪人妙
陳迹慵尋史籀文
萬里功名心獨冷
一廛耕鑿力能勤

舊遊欲問南歸趣寂寞吾今過子雲

重經烏石鋪

夾屋青松翠藹中去年經此亦匆匆
重來烏石岡頭路依舊松聲帶曉風

虛心亭

山橫鰲背碧巔岼亭對浮筠縹緲間
蕭散誰為三徑侶祇應長共白雲閒

藍田溪上

夾籬桃李趁溪斜淺清流映落花欲問武陵源上路
度雲穿石認胡麻

含雲寺書事絕句

蝶夢輕揚一室空夢回誰識此身同窓前月冷松陰碎
一枕溪聲半夜風

瀏陽五咏

洄淵浩蕩白鷗飛老懶時來坐釣磯岸幘行人聊自適
不應憔悴似湘縲

右渭水

簾捲晴空獨倚欄
冥鴻點點有無間
秋風注目無人會
時與白雲相對閒

右歸鴻閣

芙蓉彫盡蕙蘭芳
杖屨脩然一曼郎
鳬鶴短長寧復問
但知鵬鷃兩相忘

右飛鷃亭

柔條疎蔓綠交加
煙鎖雲涵去路賒
繡紱貂纓無處問
空餘雞犬兩三家

右相公臺

聖童去後水雲閒
陳迹難尋草木間
獨有微言傳野史
洞天寂寂在人寰

右洞陽

東林道上閒步二首

百年陳迹已成空
尚寄高人嘯詠中
晉代衣冠誰復在
虎溪長有白蓮風

碧眼龐眉老比丘
雲根高卧語難酬
蕭然丈室無人問
一炷爐峯頂上浮

附游酢詩

歸雁

天末驚風急
江湖野思長
悲鳴愁絕塞
接翼冒風霜
澤

岸多矰弋雲間乏稻粱茫然棲息地飲啄欲何鄉

感事

世事浮雲薄勞生一夢長散材依櫟社幽意慕濠梁風
激鷹鷂迅霜殘草木黃投閒如有約早晚問耕桑

在穎川寄中立

蕭條清穎一茅廬魂夢長懷與子居五里橋西楊柳路
至今車馬往來疎

遊寶應寺

翠律三峰帶白灣誰開蘭若翠微間竹牀雲懶禪心定
草徑苔荒屐齒斑天入碧嵐成玉宇鳥飛青嶂出塵寰
此中即是藥珠境遮莫閒吟一解顏

山中即景

翠靄光風世界青松綠竹人家天外飛來野鳥澗中流
出桃花

寶應寺讀書堂成因懷明道先生

橋西積雪度新晴卜築茅堂快落成郁郁奇花鋪野趣

開關好鳥和書聲春濃嵐色無邊景水淨天光徹底清
記得程門窓草綠至今遐想每馳情

公字定夫與龜山同在程門立雪因錄其詩附之詩
故不全乃其子孫于譜牒中抄出以應縣官之求時
知縣事者魏公時應延徐興公修誌以游劉朱蔡熊
五大儒為世家而薦山尤為建陽理學之倡其有功
于吾閩鄒魯固宜與龜山並傳矣公生在禾平里讀
書寶應寺今俱置有祠田而葬則從治命在南直隸

含山縣之車轅嶺公曾以朝奉郎出知和州云游氏族譜公族孫九言撰亦得其詩數篇于左

游九言

新作盆池戲書

瓦盆片石累青蒼興入湖山寄小窓細看纖鱗無限樂
寧妨斗水學西江

題上監西堂秀老壁

槎牙此老是枯松衲被寒窓百病攻贏得雪霜皮骨在

幾看桃李笑春風

金陵野外廢寺

寒花窈窕蔓頽牆古寺蒼苔晝掩房
犬吠屋頭山杳杳蟲鳴堦隙草荒荒
池塘淡月蘼葭冷籬竹西風橘柚香
六代江山金碧地斷碑留得管興亡

題古田寺西堂壁

傾巖終日倦躋攀暫借僧廬半日閒
砌下微流走清泚窓前含籜墮爛斑
風來有徑侵危坐雲出無心度遠山

勸取高人長寄玩相隨猿鶴傲林間

題武夷毛竹洞

毛竹連雲路欲迷洞門深鎖落花遲
曾孫幾度春風老
未入仙人一局棋



石倉歷代詩選卷一百六十

欽定四庫全書

集部

石倉歷代詩選卷一百六十一至五

詳校官庶吉士臣范逢恩

侍讀臣孫球覆勘

總校官進士臣朱鈐

校對官中書臣方大川

謄錄監生臣顧遠

與二子嗜好用一律我此復助緣語綺已多責何年一
把茅據坐孤萃穉

次韻晁無斁夏雨

咫尺隔山海作書問如何蟻垤既畜糧蛙窟如鳴鼃積
暑天復雨斧斫仍手摩東臯繁草木蘭艾不同科驚魚
畏密罟獨鳥鳴南柯稍無蟲飛喧復覺蟬語多卧聞夜
來雨歸種故山禾

和黃預感秋

欽定四庫全書

石倉歷代詩選卷一百六十一

明
曹學佺 編

宋詩三十八

陳師道

規禪停雲齋

淨居衆天人宮殿隨所適少仕老不歸重門閉榛棘道人秀叢林妙語出禪寂是身如浮雲隨處同建立平生

宿雲護朝霜秋陽佐殘暑蠅癡驅復來汗下拭莫禦庭
梧自黃隕風過成夜語黃生多新詩如盆蠶抽緒意合
無古今投暗有迎拒晚炊鄰僧米晝拾徂公茅門有曲
逆車謗甚北山女寧為溝中斷不作太倉鼠老退無好
懷續明然兩炬搔首不成眠寒蟲促機杼

和魏衍三日

林花女頰紅春水瓜頭綠步蹇我三休來周君一足苦
嗟所歷小不盡千里目暮景向昏鴉歸途取修竹

陳留市隱者

陳留人物後疑有隱屠耕斯人豈其偶滿腹一杯羹
婷小家子與君同醉醒薄暮行且歌問之諱姓名子豈
達者歟槁竹聊一鳴老生何所因稍稍聲過情閉門十
日雨吟作飢鳶聲詩書工發冢刀簡得養生飛走不同
穴孔突寧暇黔

城南寓居

遊子暮何歸韋杜城南村秋水深可測挽衣踏行雲道

暗失歸處棲鳥故不喧牛羊閉籬落稚子猶在門

送蘇公知杭州

平生羊荊州追送不作遠豈不畏簡書放麋誠不忍一
代詎數人百年能幾見昔為馬口銜今作禁門鍵夏雨
五月涼中宵潮汐滿風帆目力窮江空歲徂晚

次韻蘇公西湖觀月聽琴

清湖納明月遠覽無留雲人生亦何須有酒與桐君平
生今不飲意得同酣醺清言冰玉質壞衲山水紋殫精

有後悟畜耳無前聞潛魚避流光歸鳥投重昏信有千丈清不如一尺渾

次韻蘇公涉穎

衝風不成寒脫木還自竒坐看白日晚起行清穎湄路暗鳥遺音江清魚弄姿宇定怪物變意行覺舟遲公與兩公子妙語含風漪但怪笑談劇莫知賓主誰得句未肯吐鬱鬱見睫眉相從能幾何行樂當及茲

和魏衍三日

堤沙泥盡未及塵江波不動風生紋虎頭魚尾不知數
朱旗一點來奔雲春容已老有餘態被襖雖古無前聞
踏青摸石修祕祝落日帶雨催行人聽詩對月雨不厭
頗覺過目徒紛紛君不見天寶杜陵一老叟才大屈宋
堪為偶

和魏衍聞鶯

春力著人朝睡重葉底黃鸝鳴自送綠幕朱欄日觀明
回廊側戶風簾動昨夜春回到寒谷好鳥飛來把修竹

整翰厲觜初一鳴已落君詩專妙獨退紅著綠愁緒昏
後時獨立知何言側聽不盡已飛去懷抱此時誰與論

舟中

野火燒原雉昏雖黃塵漲天牛亂鬪江間無日不風波
老去何時脫奔走詩書滿腹不及口遮日寧須釣竿手
愧爾茅簷炙背人仰看青天搔白首

次韻無斁雪後

閉閣春雲薄開門夜雪深江梅猶故意湖雁起歸心草

潤留餘澀窓明度積陰殷勤報春信屋角有來禽

雪後黃樓寄梅山居士

林廬煙不起城郭歲將窮雲日明松雪溪山逗晚風人行圖畫裏鳥度醉吟中不盡山陰興天留憶戴公

秋懷示黃預

窓鳴風歷耳道壞草侵衣月到千家靜林昏一鳥歸冥冥塵外趣稍稍眼中稀送老須公等秋基未解圍

寄潭州張芸叟

湖嶺一都會西南更上遊秋盤堆鴨脚春味薦猫頭宣
室思來暮蒸池得借留孰知為郡樂不動越鄉愁

除棣學

老作諸侯客貧為一飽謀折腰真耐辱捧檄敢輕投早
作千年調中懷萬斛愁暮年隨手盡心事計盟鷗

除官

扶老趨巖石徐行及聖時端能幾字正敢恨十年遲肯
著金根誤寧辭乳媪譏向來憂畏斷不盡鹿門期

早春

度臘不成雪迎年遽得春
冰開還舊綠魚喜躍修鱗
柳絲絲發羈愁處處新老懷
吾自異不是故逢人

夏日即事

柳絮隨風盡歡娛過眼空
窮多詩有債愁極酒無功
家在斜陽外人歸滿月中
肝腸渾欲破魂夢更無窮

次韻夏日江村

漏屋簷生菌臨江樹作門
卷簾通燕子織竹護雞孫
向

夕微涼發相逢故意存何當加我歲從子問乾坤

秋懷

稍稍昏煙集
蓼蓼一再更
短檠看細字
高枕忘平生
來鶴妨身健
新蟾嗔眼明
已須甘酒力
不用占時名

除夜

七十已強半
所餘能幾何
懸知暮景促
逾覺後生多
遁世名為累
留年睡却魔
西歸端著便
老子不婆婆

除夕對酒贈少章

歲晚身何托燈前客未空
半生憂患裏一夢有無中
髮短愁催白顏衰酒借紅
我歌君起舞潦倒畧相同

元日

老境難為節寒梢未得春
一官無利害百慮孰疎親
積雪無歸路扶行有醉人
望鄉仍受歲回首向松筠

雪中寄魏衍

薄薄初經眼輝輝已映空
融泥還結凍落木更沾叢
意
在千年表情生一念中
遙知吟榻上不道絮因風

雪

初雪已覆地晚風仍積威
木吟端自許鳥起懶成飛
寒巷聞晨吠鄰家有夜歸
不無慚敗絮未易泄牛衣

雪意

睡眼拭朦朧開門雪已濃
客來迷舊徑虎過失新蹤
浦遠渾無鶴林疎只有松
借留如不解酒興若為慵

其二

榆關書不到雪又滿平蕪
指冷頻呵玉臂寒屢掩酥綠

斟冬至酒紅擁夜深爐塞上風沙惡征衣得達無

十五夜月

向老逢清節情懷托素輝飛螢元失照重露已沾衣稍孤光動沈沈衆籟微不應明白髮似欲勸人歸

放衆

施食鳥鳶喜持經鳥雀聽杖藜矜矍鑠顧影失伶俜門靜行隨月窓虛卧見星擁衾眠未穩艱阻飽曾經

送秦觀

士有從師樂外人那得知欲行天下獨惟有俗間疑秋
入川原秀風連鼓角悲折腰無寸補寧惜曳裾遲

送外舅郭大夫夔路提刑

天險連三峽官曹據上游百年雙鬢白萬里一身浮可
使人無訟寧煩意外憂平生晏平仲能費幾狐裘

別劉郎

一別已六載相逢有餘哀公私兩多事災病百相催無
酒與君別有懷向誰哀深知百里遠肯為老夫來

別鄉舊

數有中年別寬為滿歲期能無魚口厄聊復雁門踦齒
脫心猶壯秋清意自悲平時郡文學鄧禹復安知

別負山居士

田園相與老此別意如何更病可無醉猶寒已自和高
名胡未廣詩句尚能多沙草東山路應須一再過

老柏

歲月那能記風霜亦飽經輝輝垂重露點點泊流螢色

與江波共聲留靜夜聽轉因枯槁後潤澤出新青

歸雁

弧矢千夫志瀟湘萬里秋寧為寶箏柱肯作帛書郵遠
道勤相喚羈懷誤作愁聊寬稻粱意寧復網羅憂

和黃充實詠榴花

春去花隨盡紅榴暖欲然後時何所恨處獨不祈憐葉
葉自相偶重重久更鮮流珠沾暑雨改色淡朝煙

病起

今日秋風裏何緣此病翁力微雖杖起心在與誰同注
水瓶花醒吹薪鼎藥空百年先得老三敗未為窮

懷遠

海外三年謫天南萬里行生前只為累身後更須名未
有平安報空懷故舊情斯人有如此無復涕縱橫

南豐先生挽詞

早棄人間事真從地下遊丘原無起日江漢有東流身
世從違裏功名取次休不應須禮樂始作後生仇

丞相溫公挽詞

百姓歸周老三年待魯儒
世方隨日化身已要人扶玉
几雖來晚明堂訖受圖
心知愛諸葛終不羨曹蜍

其二

少學真成已中年謂著書
輟耕扶日月起廢極吹噓約
志寧論晚成功不願餘一為
天下慟不敢愛吾廬

別寶講主

此處相逢晚他鄉有勝緣
呪功先伏猛戒力得扶顛暫

息三支論重叅二祖禪夜牀鞋脚別何日著行纏

山口

重霧真成雨疎簾不隔風青林擁紅樹家鷺雜賓鴻漁
屋渾連水晴湖半落虹往來成一老猶在客途中

鉅野少泊

滿巷牽絲直平湖墜鏡清順流風借便捷路雪初晴鳥
度欲何向鷗來只自驚有行真快意安得易為情

河上

背水連漁屋橫河架石梁窺巢烏鵲競過雨艾蒿光鳥
語催春事窓明報夕陽還家慰兒女歸路不應長

野望

霜葉紅于染吹花落更馨平江行詰屈小徑夾蔥青度
鳥開愁眼遙山入畫屏畏人惟可飲從俗却須醒

西湖

小徑才容足寒花自送香宮池下見雁荒塚上牛羊有
子吾甘老無家去未量三年哦五字草木借餘光

湖上

湖上難為別梅梢已著春
林喧鳥啄啄風過水鱗鱗
綠有三年盡情無一日親
白頭厭奔走何地與為隣

寓目

曲曲河回復青青草接連
去帆風力滿來雁雪聲先
野曠低歸鳥江平進晚船
望鄉從此始留眼未須穿

和章秀才晚遊九曲院

冷落叢祠晚回還
峽路賒平荷留夜雨
驚鳥過隣家雲

暗重重樹風開旋旋花病軀無俗事詩得後歸鴉

後湖晚出

水淨偏明眼城荒可當山青林無盡意白鳥有餘閒身
致江湖上名成伯季間目隨征雁盡坐待暮鴉還

晚坐

柳弱知春色梅寒釀雪花溪明數積石月過戀平沙病
減還增藥年侵却累家後歸棲未定不但指昏鴉

寒夜

留滯常思動艱虞却悔來寒燈挑不焰殘火撥成灰凍
水滴還歇風簾捲復開孰知文有忌情至自生哀

宿濟河

燭暗人初寂寒生夜向深潛魚聚沙窟墜鳥滑霜林稍
作他年計初回萬里心還家祇有夢更著曉寒侵

寄晁無斁春懷

稍聽春鳥語丁寧又見官池出斷冰雪後踏青誰與共
花邊著語老猶能笑談莫倦尋常聽山院終同一再登

今日已知他歲恨，搶榆況是復飛騰。

九日寄秦少游

疾風迴雨水，明霞沙步叢祠欲暮鴉。
九日清樽欺白髮，十年為客負黃花。
登高懷遠心如在，向老逢辰意有加。
淮海少年天下士，可能無地落烏紗。

寄送定州蘇尚書

初聞簡策侍前旒，又見衣冠送作州。
北府時清惟可飲，西山氣爽更宜秋。
功名不朽聊通籍，海道無違具一舟。

枉讀平生三萬卷禦寒當復敝貂裘

庚辰三月晚登白門閒望

重門傑觀屹相望表裏山河自一方
小市張燈歸興動輕衫當戶晚風長
孤臣白首逢新政遊子青春見故鄉
富貴本非吾輩事江湖安得遂相忘

和黃預七夕

盈盈一水不斯須經歲相過自作疎
坐待常禽報佳會徑須飛雨洗香車
超騰水部陳篇上收拾愚溪作賦餘

信有神仙足官府我寧辛苦守殘書

次韻李節推九日登山

平林廣野騎臺荒山寺鳴鐘報夕陽
人事自生今日意寒花只作去年香
巾歌更覺霜侵鬢語妙何妨石作腸
落木無邊江不盡浮生此日更須忙

次韻何子溫祈晴

虎節當關信不傳
瓣香纔上已回天
驅除霧雨還朝日
蓄縮波濤復二川
奪目光華聞秀句
堆場藁秸驗豐年

從今更上中和頌少費將軍九萬箋

和和叟梅花

百卉前頭第一芳低臨粉水浸寒光卷簾初認雲猶凍
逆鼻渾疑雪亦香鼎寶自期終有待天真不假更勻妝
江南望斷無來使且伴詩翁入醉鄉

雪後

送往開新雪又晴應留勝白待春青稍回杉色和梅怨
併得朝看與暮聽已覺庭泥生鳥跡遽修田事帶朝星

暮年功利歸持律不是騷人故獨醒

早起

鄰雞接響已三鳴殘點依稀煞五更
寒氣挾霜侵敗絮賓鴻將子度微明
有家無食惟高枕百行千窮只短檠
翰墨日疎身日遠世間那得尚虛名

送王元均貶衡州無寄元龍

先生秀句滿江東二子緣渠得再窮
詩禮向來堪發冢孫劉能使不爲公
炎方瘴癘消軒豁故國山河閱始終

傳語元龍要相識江湖春動有來鴻

絕句

里中餽杏得嘗新馬首相逢始見春
勤苦著書如作吏
世間誰是最閒人

絕句

書當快意讀易盡客有可人期不來
世事相違每如此
胸懷百歲幾曾開

石倉歷代詩選卷一百六十一

欽定四庫全書

石倉歷代詩選卷一百六十二

明 曹學佺 編

宋詩三十九

曾幾

嶺梅

蠻煙無處洗梅蘂不勝清
顧我已頭白見渠猶眼明
折來知韻勝落去得愁生
坐入江南夢園林雪正晴

鄧帥寄梅併山堂酒

甓社湖邊路詩筒得報回
舊時雲液酒新歲雨肥梅
不是園官送真成驛使來
鬢毛都白盡更著此花催

雪中登王正中書閣

對雪誰堪語登樓似欲仙
人家修月戶丈室散花天
峰疊鈎簾外江橫隱几前
寒深落雁渚清集釣魚船
解病從摩詰消愁得仲宣
展書明細字烹茗濕疎煙
月好還同夢詩成已下弦
明年倘相憶為一到關邊

喻子才提舉招昌源觀梅倦不克往蘇仁仲有

詩次韻

問君何許看花回賸說郊垌十里梅樹雜古今他處少
枝分南北一齊開昌源已辦行厨去離渚猶煩使節來
況復蘭亭公所葺清流九曲要傳杯

上元日大雪

勾芒整轡浹辰間雪片相隨大可觀挑菜園林有餘潤
燒燈庭院不勝寒柳條弄色政爾好梅蕊飄香殊未闌

便是落花飛絮去直疑春事併衰殘

食笋

花事闌珊竹事初一番風味殿春蔬
龍蛇戢戢風雷後
虎豹斑斑霧雨餘
但使此君常有子何憂
每食歎無魚
丁寧下里須留取障日搖風却要渠

長至日述懷無寄十七兄

老來逾覺白駒忙
眼看重陽又一陽
心似死灰飛不起
技如寒日短初長
厭看賓客空投謁
強對妻孥略舉觴

回首山陰酬勸地應憐鴻雁不成行

壬戌歲除作明朝六十歲矣

禪榻蕭然丈室空薰銷火冷閉門中光陰大似燭見跋
問學只如船逆風一歲臨分驚老大五更相守笑兒童
休言四十明朝過看取霜髯六十翁

歲盡

漏箭更籌日夜催萬牛那挽白駒回梅花雪片歲除盡
萱草柳芽春鼎來病裏詩書原不讀貧中尊俎未曾開

年光似此真虛擲請以丹心學死灰

大雨志喜呈高侍御

一夕驕陽轉作霖夢回涼冷潤衣襟不愁屋漏床床濕
且喜溪流岸岸深千里稻花應秀色五更桐葉最知音
無田似我猶欣舞何況田家望歲心

謝人送壑源絕品云九重所賜也

三伏汗如雨終朝霑我裳誰分金掌露來作玉溪涼別
甌軟炊飯小爐深炷香麴生何等物不與汝同鄉

迪姪屢餉新茶

吾家今小阮有使附書頻喚起南柯夢持來北焙春顧
予多下駟況復似陳人不是能分少其誰遣食新
救厨羞煮餅掃地供爐芬湯鼎聊從事茶甌遂策勲興
來吾不淺送似汝良勤欲作柯山點當令阿造分

迷姪餉日鑄茶

寶胯自不乏山芽安可無子能來日鑄吾得具風爐夏
木轉黃鳥僧窓行白駒談多喚坐睡此味政時須

次韻雪中

積雪何所待凍雲終未開
有時聞瀉竹無路去尋梅
只欲關門卧誰能蕩槳來
辟寒須底物正令麴生才

種竹

近郊宜竹樹手植滿庭隅
餘子不足數此君安可無
風來當一笑雪壓要相扶
莫作封侯想生成鄙木奴

走筆

市上無佳筆營求亦已勞
護持空雪竹束縛欠霜毫
此

物藏三穴須公拔一毛不堪髯主簿取用價能高

巖桂

粟玉粘枝細青雲剪葉齊團團巖下桂表表水中犀江
樹風蕭瑟園花氣慘淒濃薰不如此何以慰幽棲

曾宏父分餉洞庭柑

黃柑送似得嘗新坐我松江震澤濱想見霜林三百顆
夢成羅帕一雙珍流雲嚙霧真成酒帶葉連枝絕可人
莫向君家樊素口瓠犀微齟遠山顰

荔子

異方風物鬢成斑
荔子嘗新得破顏
蘭蕙香浮襟解後
雪冰膚在酒酣間
絕知高韻傾瑤柱
未覺豐肌病玉環
似是看來終不近
寄聲龍目漫追攀

郡中禁私釀嚴甚戲作

結交歡伯無他腸
小槽竊比顧建康
此身忽墮禁酒國
何路得到無功鄉
官酤快甚夏酌水
齊釀慙于冬顧湯
客來且復置是事
北焙薦浣春風香

避寇遷居郭內風雨淒然鄭簡道餉酒

煙雨昏昏二月梅全家避寇寄城隈
欲尋碧落侍郎去遽沐青州從事來
令我妻孥爭洗盞想公伯仲正傳杯
安能鬱鬱久居此且傍茶山松逕回

返魂梅

逕菊庭蘭日夜摧禪房未合有江梅
香今政作依稀似花乃能令頃刻催
開笑巫陽真浪下寄聲驛使未須來
為君浮動黃昏月挽取林逋句法回

瓶中梅

小窓冰水碧瑠璃
梅花橫斜三四枝
若非風日不到處
安得石色如許時
神情蕭散林下氣
玉雪清映潤中姿
陶弘毛穎果安用
疎影寫盡無聲詩

雪作

卧聞惟霰却無聲
起看堦前又不能
一夜紙窓明似月
多年布被冷于冰
履穿過我柴門客
笠重歸來竹院僧
三白自佳清亦好
諸山粉黛見層層

送倉部呂治先守齊安

齊安剖竹要循良分付吾家坦腹郎
賸有江山連赤壁終稀訟獄到黃堂
鈴齋晝永宜深念邊瑣秋高合過防
此地元之遺烈在風流容易鬢毛蒼

石倉歷代詩選卷一百六十二

欽定四庫全書

石倉歷代詩選卷一百六十三

明 曹學佺 編

宋詩四十

劉弇

送方絢解元赴試南宮用桂林一枝為韻

君王十二閑一一登權奇飽之青玉芻絡以黃金羈南宮舊冀北雜遝追風姿驕驪固神物豈病孫陽嗤如聞

丹桂約暗滿秋風枝

癸酉歲暮壽春道中

有城有城半蕪沒
倔强當年開狡窟
青韁白馬成底事
魏得其狗空凌突
清淮不洗贛利腸
石馬崔嵬化英物
據鞍浩歎為踟躕
但見悲風起蓬勃

其二

有客有客垢髮鬚
羹魁挂鞍無宿儲
翹心北闕比寒藿
他日南山拋舊廬
逆旅丈人真脆意
揖我下牀邀踞蹠

悠悠高門擊鮮子萍匏殊根勿誚渠

走筆答郭子隆勾稽

春歸幾何時綠樹陰已滿蕭條子雲巷誰借吹噓暖常
日雙柴扉深局類休澣稚燕掠翩翩疎蟬弄淒斷擷芳
聊自娛任從食息懶疑疑棲鸞郎蝸居間三款兒童憚
逢迎應客事謾誕謝絕高軒榮祇增鼯鼠短賴君不吾
靳慙懃接閭侃酸然梅雨天煩襟斗湔浣

送李侯朝散還任

西山閱今昔章水弄清泚雲罍挿天半滕閣中隱起青
鴛千萬家湖光豁如洗鍾陵一都會信亦非偶爾君來
無幾何所得已倍蓰笑談送白日慷慨拾遺軌成詩殆
百篇天籟落凡耳事竣告還朝相送情難已悲歌一再
行杯觴覆蒼翠秋標拔孤雲鴻雁思吾子

石廊洞

君不見仙家三十六洞天西南大半盤蒼巔此外元陽
擅嶄絕况有石廊人喜傳碧蓮參差隅地湧徙倚危梯

飛蟬蝨陰陰洞戶半空開一縷聯凹愁寄種萬鈞崔嵬
挂礪石吁可怪兮若飛動天然湫面尋丈間寒掬初慳
媪神捧紫厓蒙茸瑤草秀懸泉涓涓挹天酒淑靈豈即
乾坤私窟宅宛是神仙舊飛鳥點影陽光回遊子履深
驚殷雷九夏三冬自回幹雨暘寒燠爭喧阗神物奄有
似無謂突兀古廟當巖隈鼪鼪笑舞助怪變落日愁絕
松風哀瞰臨一方殆天意累露之疑此其是仙乎仙乎
胡不歸忍使秋燐泣陰鬼

人日

去年人日螺江邊今年人日在通川故家浩蕩五千里
客子騷屑心茫然霜蘆盡解故時葉生意陡爾歸蘭茝
海風如刀冰塞渡欲航野水雪暗天他鄉信美非吾土
香草悅魂真浪傳南冠故聲祗操楚劉章雅志惟歌田
五秉如單費廩粟一囊就盡持殮錢顛毛冉冉不吾與
齒根浮動輕于翾小雀誰言畏死鷄未肯屈折同梧栳
章貢直西三徑在爾來望眼欲成穿科桑洗竹真吾事

孰使齷齪纔充員何時解得無拘束歸釣潭頭楓葉鱖
送刑清臣赴左選

泊舟梅林浦解纜墨潭灣層波日日生雙漿那得閒龐
眉青翰客相與春風還江梅吹欲盡岼柳未勝攀無以
持贈君對君成強顏官况更新好晚步非間關直北清
夢多半落夷門山慙慙尺素語勿為魚鴻慳

宿法藏禪院

斜河左界懸朱提冷燼掠天螢糝飛高梧泣液涼參差

前村後村烏夜啼
雕甍繡拱絕坤維
知自在世張禪扉
有睨釋子龐兩眉
清楚一聲捎翠微
亂我心曲天之涯
寂歷故感迎新悲
歸歟誰是真忘機
獨鹿水深愁濁泥

憶黃天倪

遊絲罥空生別愁
我車欲駕羌無輶
驚風吹花濺紅雨
天脚空隨江水流
思君度日倚高閣
時把長懷寄寥廓
青春九十行過半
白日西住看時落
古人不願身後名
但願生前一杯酌
安得此身生羽翰
高竊便似追飛鶴

村南

村南行吟踏新場馬乘款段壺懸漿稼如濃雲穠含黃
柿葉亞枝收趁霜臘團雞髀盤餚香簫鼓下神巫正狂
呼兒往問當壚娘清美何如顧建康

安成道中作

故家楚尾隣三湘粗有晴地麻與桑利機未判身輕嘗
生涯寄將一葉上歸釣潁尾秋滄浪

其二

翠篠娟娟棲暗芳半隱半見誰門牆分曹戲兒疑雁行
今我垂垂老境逼竹馬鳩車憐汝狂

夜歎

丹鳥白鳥爭吞吐還雲去雲無定度不無夏簟工熨體
况有秋螢競扶戶一嘅三嘆詎如許客思紛紛野煙縷
宵明景晏挂斜河叢萱苒弱團清露有美一人在西方
白玉珮環珠兩璫明眸皓齒艷朝陽企予望汝涕滂皇
安得鵲汝羅衣裳

畏日

畏日慘慘天西隅半規銜山我僕痛招提訪尋數里近
牛羊斷續前村孤揚塵動滿垢膩爪好風不借清涼軀
日送長雲下碕礧驚鳥愁對陂陰湖

杉溪驛

竹巖杉溪道路長道邊古驛開蒼茫分流溪水薄枉渚
挨石人家環上方王程星火何時歇霜冬草樹芸其黃
去來今昔幾男子姓字喧傳兩女郎

北禪水閣走筆

西風涼客衣，弭楫滄江潯。
晚吾事瀟灑，聊復此登臨。
雲容不礙秋清樾，有餘陰。
煩心洗東波，寸目明遙岑。
樊籠脫鳥窟，搖落弔蛩吟。
莽墟閱今昔，長慨撫孤鐔。
故楚冠劍盡，物情幾浮沈。
懷哉歲將月，無為空滯淫。
持語朱陵翁，須以早抽簪。

感遇

嬋娟誰家子，粲粲生輝光。
弄姿俯春蘭，臨風振微芳。
秋

水揚清矚白玉雙明璫問渠家何許笑指南山陽去去
不輟軌恍若遊雲翔遙看入縹緲明月斷人腸

其二

富貴苦不常倏忽移易人青門聚瓜客曾是故侯身金
鏡失秦家中原駭煙焚屠狗販繒子問閭排氤氲一逢
泗水公濯鱗清滄濱信知天地間虛橐鼓遊塵冥中有
神力呼吸旋峨岷小兒善播弄挈故還趨新得失定有
寄無為喪吾真

其三

疾雷疑車音出門乃知非抱影長自明流螢點霜幃羅帶翦秋水黃金縷春衣持看清夜闌愁非故時輝食葵心知傾茹蠟腸虛肥纂纂東下歌惜此歲月違因聲勸語儂勿復遲遲歸

秋日儀真即事

秋風來從越天末痛洗玻璃出明月雲罍隱起玉龍眠下有春容萬濤雪獨蠶之綸欵一葉半酣老漁棹歌發

客心寸許了無多底事臨風吹欲折

其二

客從南來一何癯烏紗不屋非縵胡散堆亂帙覘牛鑿
穿穴殫殘真蠹魚尋撞雖上亦未計立仗不鳴甘豆芻
昔人舉肥我今爾安得外澤如瓠壺

持釣

艇子悠揚打雨來裊絲越箭青玫瑰昨聞古湫新雨足
漲波泛入西溪來西溪兩岸行人少白鷺對翹佳客陪

低雲弄嬌不成去半與枉渚相縈迴藻間頰尾厠銀鯽
正爾作羣爭鰓腮故應沈餌得所置行醉甕間新熟醅

宿長山寺

蒼山兩蟠虬傑勢分天矯不緣事幽尋茲地終難到破
暝紫煙生寫谷清樾好村長下牛羊雲綻入歸鳥松風
卷孤磬夜半秋聲小客懷方未央千里漫白道庭樹一
鳥驚愁看楚天曉

遊麻姑觀用黃道士韻

鳥道參差挂空白雲林曾是飛昇迹漫論滄海復揚塵
已識秋杉老岑寂玉駕斑龍飛九色古殿崔巍遺石刻
會須揖彼丹丘人掇拾頽年茲偃息

蔣沙莊居

他日蓬蒿地吾廬瓦數溝井泉甘勝乳庭竹冷先秋村
巷時情淡田疇歲計優荆扉論日掩最喜近松楸

其二

黃嶺虹腰抱鼇山負復橫中非避世士稍亦畏時名傍

晚澆慵酒尋春濯足行
雞雛嬌底死犢子健能生

其三

晴屋鳴鳩婦春陂翳雉媒
筋頭甘野蕪鋤力到陳荄
掠水千艘健橫風一笛哀
最憐雙白鳥解事等閒來

其四

名愧周繁弱材非魯孟勞
蛙仍當鼓吹徑任沒蓬蒿
紫芋新厨味黃棖馥鱸刀
業詩何水部耽酒阮兵曹

其五

劉宗墳墓國金水眇縈回
颭颭雅巢覆疎疎槿戶開
春風持贈柳臘雪試妝梅
欲識塵埃少元無俗物來

莆田雜詩

清樾陂陀外春深四五家
叢祠下簫鼓平楚暗桑麻
水國潛虬傲天程去鳥賒
仙山仍在目瀟灑送生涯

其二

梅雨催農鑄癡風泣海檣
魚龍波浪闊燕雀戶庭涼
鯨柱春劖玉螭山夜鑿霜
家園兩痕淚早晚促吾裝

其三

梅井經疏鑿如聞自昔人玉奩深貯月雲乳暖藏春桐
葉誰新汲葵芽好問津端堪事杯酌冷汰客襟塵

其四

鷓鴣青春晏魑鮑白社驕掠風雛燕翼界雨晚虹腰醪
醪銀牀瀝茸茸紫澗苗到家幸無苦浦溆有回潮

其五

鶴唳歸雲急龍移過雨腥桂清飄月岫槎老卧煙汀洞

失壺公舊雪傳妙應靈不緣幽事隔小復理簞簞

其六

道東無際海萬水自朝宗沃日纔分爝浮天亦盪曾吐
吞何楚越冗長到魚龍好在乘桴客吾安議適從

早發赴蒙縣

草露垂垂白溪泥脚脚深槿籬藏吠犬桑翳漏棲禽食
匕驚浮世鞭梢度寸陰利名無計得寧是死灰心

試院次韻奉酬趙達夫記室惜春之什

風酣雨軟裊簷絲端負吾人痛飲師使者嶺梅傳信遠
王孫芳草怨歸遲釀成紫府無端夢開到朱欄第幾枝
欲問東君挽流轉顛狂好在曲江詩

清真觀步翠閣

飛梯倒插玉螭竦危欄別刻青芙蓉送涼野水舊涵竹
借色春山擬滴裾王喬過鳧可坐揖蕭史鳴鳳徒紛如
眸子欲酸跂予望弔世清淚橫方諸

九曲池

昔帝檣烏下日邊曾留清蹕此踟躕魚龍窟暗浮春漲
鳬雁行低破暝煙星閣推頽空歲月蕪城埋沒舊山川
後庭一曲陳家破更看當年水調傳

江館

山川定出書意外魚鳥自閒眠對時艇子黏天歸一葉
濤頭吹雨落千麾截波尚欲論孤劒應客初慙乏大兒
聽得漁郎隔溪語夜來秋色暗江籬

建州試院次韻和林源叔監試

鷺袍粉白筆摩秋餘地爭看衆刃游堅壁賴公專細柳
得壺如我愧中流僕姑此日先穿札綠綺何心曉報鏐
恰恰豐隆通蟄戶論功相與副旁求

春日送簽判陽承議

春山野思萬千重那更江頭來送公別淚滴流紅杏雨
離情搖曳綠楊風一枝易遶南飛鵲隻字難憑北塞鴻
惟有感恩情不斷夜深長入夢魂中

春日舟中即事

不應門有北堂親
肯泛孤舟瘴海濱
萬里江湖愁去客
一春風雨厭行人
花朝水國留題懶
月夜鄉園入夢頻
每被煙波驚破膽
却思雲石自由身

三用前韻酬達夫

花氣曛曛活逼樓
十分大白直須浮
自慚短髮如煙薄
敢買鈿車貯莫愁

其二

柳挽花牽獨自狂
鼓催鐘趁幾人忙
重城特解春將閉

時放紅英笑女牆

其三

駢棘重開不自由
橫將匏繫代萍流
飛絲莫罥林塘興
留與騷人作四愁

鄧縣君挽辭

九原秋草沒麒麟
哀挽黎明出問津
花魄欲招誰些楚
簫聲先斷客愁秦
冢間白鶴空雙舞
天上黃姑定卜隣
哲哲目存成底事
空餘粉墨逼天真

石倉歷代詩選卷一百六十三

欽定四庫全書

石倉歷代詩選卷一百六十四

明 曹學佺 編

宋詩四十一

陳與義

試院春晴

今日天氣佳忽思賦新詩春光挾晴色併上桃花枝
白雲浩浩去天色青陸離餘霏遇晚日彩翠紛新奇天公

出變化驚倒癡絕兒逶迤或耐久美好固暫時平生一枝筇穩處念力衰澹然意已足却赴青燈期

休日早起

矐矐窓影來稍稍禽聲集開門知有雨老樹半身濕劇讀了無味遠遊非所急蒲團著身寬安取萬戶邑開鏡白雲度捲簾秋光入飽受今日閒明朝復羈縶

夜步堤上

旋買青芒屨去踏沙頭月爭教冠蓋地著此影突兀樹

寒棲鳥動風轉孤管發月色夜夜佳人生事如髮夢中
續清遊濃露濕銀闕

題唐希雅畫寒江圖

江頭雲黃天醞雪樹枝慘慘凍欲折耐寒野鴨不知歸
猶向沙邊弄羽衣黃茅終日不自力影亂弱藻相因依
惟有蒼石如卧虎不受陰晴與寒暑舟中過客莫敢言
閒伴長江了今古

渡江

江南非不好楚客自生哀搖櫂天平渡迎人樹欲來雨
餘吳岫立日照海門開雖異中原險方隅亦壯哉

連雨書事

九月逢連雨蕭蕭穗送秋龍公無乃倦客子不勝愁雲
氣昏城壁鐘聲咽寺樓年年授衣節牢落向他州

寒食

草草隨時事蕭蕭傍水門濃陰花照野寒食柳圍村客
袂空佳節鶯聲忽故園不知何處笛吹恨滿清樽

雨

沙岸殘春雨茅簷古鎮官一時花迸淚萬里客憑欄日
晚薔薇重樓高燕子寒惜無陶謝手盡可破憂端

晚步

畎畝意不適出門聊散愁雨餘山欲近春半水爭流衆
籟夕還作孤懷行轉幽溪西篁竹亂微徑雜歸牛

雨

雲物淡清曉無風溪樹間柴門對急雨壯觀滿空山春

雨思

小閣當喬木清溪抱竹林寒聲日暮起客思雨中深行
李妨幽事闌干試獨臨終然遊子意非復昔人心

雨中

北客霜侵鬢南州雨送年未聞兵革定從使歲時遷古
澤生春靄高空落暮鷺山川含萬古鬱鬱在樽前

將次葉城道中

荒野少人去竹輿伊軋聲晴雲秋更白野水暮還明寂
寞信吾道淹留諳物情王喬有餘舄借我一東征

宿資聖院閣

暮投山崦寺高處絕人羣遠岫林間見微泉舍後聞閣
虛雲亂入江闊野橫分欲與僧為記今年懶作文

道中寒食二首

飛絮春猶冷離家食更寒能供幾歲月不辦了悲歡刺
史葡萄酒先生苜蓿盤一官違壯節百慮集征鞍

斗粟淹吾駕浮雲笑此生有詩酬歲月無夢到功名客
裏逢歸雁愁邊有亂鶯楊花不解事更作倚風輕

連雨書事

風伯方安卧雲師亦少餐氣連河漢潤聲到竹松高老
雁猶貪去寒蟬遂不號相悲更相失滿眼楚人騷

試院書懷

細讀平安字愁邊失歲華疎疎一簾雨澹澹滿枝花投
老詩成癖經春夢到家茫然十年事倚杖數棲鴉

春雨

花盡春猶冷，羈心只自驚。
孤鶯啼永晝，細雨濕高城。
擾擾成何事，悠悠送此生。
蛛絲閃夕霽，隨處有詩情。

岸幘

岸幘立清曉，山頭生薄陰。
亂雲交翠壁，細雨濕青林。
花落客心碎，鳥啼春意深。
窮鄉愁節換，時得一閒吟。

雨

雲起谷全暗，雨晴山復明。
青春望中色，白澗晚來聲。
遠

樹鳥羣集高原人獨耕老夫逃世日堅坐聽陰晴

晚晴野望

洞庭微雨後涼氣入綸巾
水底歸雲亂蘆叢返照新遙
汀橫薄暮獨鳥度長津
兵甲無歸日江湖送老身
悠悠
兼倚杖悄悄自傷神
天意蒼茫裏村醪亦醉人

年華

去國頻更歲為官不救飢
春生殘雪外酒盡落梅時
白日山川映青天草木宜年華不負客一一入吾詩

金潭道中

晴路籃輿穩舉頭閒望賒前崗
春泱泱後嶺雪槎牙海
內兵猶壯村邊歲自華
客行驚節序回眼送桃花

別呂伯恭

樽酒相逢地江楓欲盡時
猶能十日客共出數年詩
供
世無筋力驚心有別離
好為南極柱深慰旅人悲

感事

喪亂那堪說干戈竟未休
公卿危北去江漢故東流
風

斷黃龍府雲移白鶯洲云何舒國步特底副君憂世事
非難料吾生本自浮菊花紛四野作意為誰秋

聞王道濟陷敵

海內堂堂友如今在敵圍虛傳袁盎脫不見華元歸浮
世身難料危途計易非雲孤馬息嶺老涕不勝揮

過孔雀灘贈周靜之

海內無堅壘天涯有近親不辭供笑語未慣得慙慙舟
楫深宜客溪山各放春高眠過灘浪已寄百年身

蠟梅

智瓊額黃且勿誇回眼視此風前葩
家塗黃作杏帶歲歲逢梅是蠟花
世間真偽非兩法映日細看真是蠟
我今嚼蠟已甘腴況此有韻蠟不如
只愁繁香欺定力薰我欲醉須人扶
不辭花前醉倒卧經月是酒是香君
試別

次韻富季申主簿花

東風知君將出遊玉人迴立林之幽
欹墻數苞乃爾瘦

中有萬斛江南愁君哦新詩我聽熒句裏無塵春色靜
人人索笑那得禁獨為君詩起君病欲語未語令人嗟
桃李回看眼底沙同心不見昭儀種五出時驚公主花
典衣重作明朝約聊復寬君念歸洛笛催疎影日更疎
快飲莫教春寂寞

送王周士赴發運司屬官

寧食三斗塵有手不揖無詩人寧飲三斗醋有耳不聽
無味句牆東草深蘭發薰君先夢我我夢君小窓誦詩

燈花喜窓外北風怒未已書生得句勝得官風其少止
盡人歡五更月暈一千丈明日君當泛淮浪去去三十
六策中第一買酒鑒北風

立春雨

衡山縣下春日雨遠映青山絲樣斜容易江邊欺客況
分明沙際濕年華竹林路隔生新水古渡船空集亂鴉
未暇獨憂巾一角西溪當有續開花

觀雨

卷一百六十四
山客龍鍾不解耕，開軒危坐看陰晴。
前江後嶺通雲氣，萬壑千林送雨聲。
梅壓竹枝低復舉，風吹山角晦還明。
不嫌大地無乾處，正要羣龍洗甲兵。

送客出城西

鄧州誰亦解丹青，畫我羸驂晚出城。
殘年政爾供愁過，末路那堪送客行。
寒日滿川分衆色，暮林無葉寄秋聲。
垂鞭歸去重迴首，意落西南計未成。

清明

雨晴閒步澗邊沙行入荒林聞亂鴉寒食清明驚節序
暖風遲日醉梨花書生投老王官谷壯士偷生漂母家
不用鞦韆與蹴鞠只將詩句答年華

對酒

陳留春色撩詩思一日搜腸一百迴燕子初歸風不定
桃花欲動雨頻來人間多待須微祿夢裏相逢記此杯
白竹扉前容醉舞煙光渺渺望高臺

以事走郊外示友

二十九年知已非今年依舊壯心違黃塵滿面人猶去
紅葉無言秋又歸萬里天寒鴻雁瘦千村歲暮鳥烏微
往來屑屑君應笑要就南池照客衣

龍門

不到龍門十載強斷崖依舊立斜陽金銀佛寺浮佳氣
花木禪房接上方羸馬乍來還竟去流鶯多處最難忘
老僧不作留人意坐水看山白髮長

登岳陽樓

洞庭之東江水西簾旌不動夕陽遲登臨吳蜀橫分地
徙倚湖山欲暮時萬里來遊還望遠三年多難更憑危
白頭弔古風霜裏老木滄波無限悲

除夜

城中爆竹已殘更朔吹翻江意未平多事鬢毛隨節換
盡情燈火向人明比量舊歲聊堪喜流轉殊方又可驚
明日岳陽樓上去島湖煙霧看春生

元日

五年元日只流離楚俗今年事事非
後飲屠蘇驚已老長乘舴艋竟安歸
攜家作客真無賴學道刳心却自違
汀草岼花知節序一身千恨獨霑衣

雨晴

天缺西南江面清纖雲不動小灘橫
牆頭語雀衣猶濕樓外殘雷氣未平
盡取微涼供穩睡急搜奇句報新晴
今宵絕勝無人共卧看星河盡意明

懷天經智老因以訪之

今年二月凍初融睡起茗溪綠向東客子光陰詩卷裏
杏花消息雨聲中西庵禪伯還多病北柵儒仙只固窮
忽憶輕舟尋二子綸中鶴氅試春風

寓居劉倉廨中晚步過鄭倉臺上

紗巾竹杖過荒陂滿面春風二月時世事紛紛人易老
春陰漠漠絮飛遲士衡去國三間屋子美登臺七字詩
草遶天西青不盡故園歸計入支頤

重陽

去歲重陽已百憂今年依舊歎羈遊
籬底菊花惟解笑鏡中頭髮不禁秋
涼風又落宮南木老雁孤鳴漢北州
如許行年那可記謾排詩句寫新愁

舟行遣興

會稽尚隔三千里臨賀初盤一百灘
殊俗問津言語異長年為客路歧難
背人山嶺重重去照鷁梅花樹樹殘
酌酒舵樓今日意題詩船壁後來看

次韻尹潛感懷

胡兒又看遼淮春歎息猶為國有人可使翠華周寓縣
誰持羽扇靜風塵五年天地無窮事萬里江湖見在身
共說金陵龍虎氣故臣迷路感煙津

眼疾

天公嗔我眼常白故著昏昏阿堵中不怪叅軍騎瞎馬
但妨中散送飛鴻著籬令惡誰能對損讀方奇定有功
九惱從來為佛種會知那律證圓通

秋夜

中庭淡月照三更白露澄空河漢明
莫遣西風吹葉盡却愁無處著秋聲

清明

街頭女兒雙髻鴉隨蜂趁蝶學妖邪
東風也作清明節開徧來禽一樹花

石倉歷代詩選卷一百六十四

欽定四庫全書

石倉歷代詩選卷一百六十五

明 曹學佺 編

宋詩四十二

李觀

流杯池

幽居久不樂心死如濕灰聞言山有池仙客曾流杯披
衫向西坐欲望無崇臺何當命遊宴盡聚不羈才顧恐

狹隘地未足開吾懷仰手斲河漢決向天南來移舟復
轉嶽壅遏成環迴橫持北斗柄量盡酒星醅箕踞接下
流一飲空千壘八風助吟唱萬怪供嘲諧醉來散髮卧
蠅聲視霆雷冷笑勢利子茫茫塵土堆

穫稻

朝陽過山來下田猶露濕餉婦念兒啼逢人不敢立青
黃先後收斷折偃僂拾烏鼠盈官倉新租喜復入

寄懷

鳥獸死有用羽角筋革齒輦輓入工師飾作軍國器玉
食白如瓠瞋目已腐穢生者不敢留埋藏與螻蟻百年
富貴身孰若鳥獸類惟有令人名終古如不死

其二

根生但為松翼飛但為鳳王侯尚可輕道義本來重癡
兒似婢妾寸步矜恩寵傍人忍笑時佯把衣袂弄

江亭醉後

平生尚倜儻壯大苦摧折主人能結納佳境為鋪設渺

滄東江來豁訝暮雲裂倡女稍多藝市酒且供啜俠氣
復何聊心朋幸相悅解冠從放蕩大呼誰輓掣咄哉千
里足嗟呼三寸舌艷唱聲非雅戲譚理當謫帷房笑私
昵間巷嘲瑣屑更鼓莫催睡夜風纔去熱俗士鮮大志
于今重小節內行豕在泥外貌犬伏紕吾儕古英豪方
寸浴日月被謗肯自疑為歡顧猶拙放飯彼不慙使我
無齒決

美女篇

繁霜毒春木花開苦不早愚夫擇利婚美女貧中老曷
不治顏色門前車馬道閨房有禮文自銜誰言好俗態
競朱粉古心慕蘋藻所期君子恩卒以慰枯槁

竹齋題事

低齋結空野小竹移孤林齋閒竹淨好日媚幽人心南
方夏厭暑獨此留殘陰戛雨挫殘夢穿風搜涼襟長茵
展麗蘚亂歌奏歡禽待奴裏村服語客拋塵簪志高成
利讐思爽生詩淫值聖喜盈卷感古悲入琴山迎穩履

遠月勸澄杯深榮名雖未染幸亦非堙沈

愁熱

江湖限南鄙秋令到還稀節換空看歷人間未趁衣齊
紈方得意屢燕莫言歸祇有松筠徑風高暑氣微

鑑湖夜泛

明月到樽前拏舟古岸邊亂山斜入霧遠水倒垂天酒
氣薰龍戲歌聲弄鶴眠迴頭嗤李郭此外更無仙

閒居

無物可勞情空郊日閉局雨吟春破碎貧飲客凋零世
事重江險才名一夢醒同心祇松柏見我尚青青

送張駿嶧

人意皆懷土嗟君無故園欲行須盡室此去又他門靜
裏文章好貧來節行存振掩知有日倚伏豈虛言

寄題廖說蒙亭

聖人雖在上君子有窮時自得山居樂何須世俗知夜
多松月分涼與水風期只恐亨通去清閒却付誰

遠山

最能牽病眼天際一山橫
盡日是秋色無人知地名暗
時雲自合缺處路應平
才子霑衣淚千秋共此情

哭女

妻死女已病踰年成二喪
此生誰骨肉未識好衣裳
看面雖愁小聞言盡可傷
最知憐祖母句句刮人腸

寄題鄒氏延壽亭

一世躋仁壽君今更欲延
山中想無事分外得長年
松

老多經雪雲閒不到天區區殉名者迴首倍淒然

感秋

徙倚重咨嗟非緣惜歲華關山異鄉客砧杵別人家天
冷雲含日溪清水獻沙屈魂終不返悲思更無涯

次韻答陳殿丞

不能隨薄俗非是向深山自喜道無屈所嗟心未閒酒
鄉貧更入詩債病猶還一字成虛美通宵只厚顏

讀趙氏淳化詩集

少年曾誦習誤認古人詩風雅世不重姓名誰得知高
情如隱者薄宦過明時地下尋才鬼應逢陸與皮

送李侍禁

三載盱江上軍和盜亦殲事煩終不倦貧極始知廉別
袖揮寒日歸舟載夜蟾懋功宜有賞天意在官占

寄周寺丞

我愛南豐宰天資舉措奇上官如不怒善政有誰知賦
役貧中減鞭笞曠處施邑人多未悟去後始應思

怡山長慶寺

行行金碧裏氣象恍如春
不記來時路自嫌衣上塵
院香知有佛僧靜似無人
十載京華夢相逢一度新

書樓夏晚

地僻無他管樓危有剩涼
遠流通越派殘日共秦光
鳥道頑雲黑人家病葉黃
高情夢箕顙閒景畫滿湘
山藥香多桂漁歌濁少商
太平知可喜何者是簪裳

悶書

行行四月晦絺綌未能裁
天氣疑無定春寒恐再來
襲衣從汗浹交扇取風回
野秀深成候鑪薰冷作媒
年高情已淡俗薄意多猜
李杜今何在芳樽誰與開

少年

新翻曲調恐人傳
不許高聲唱玳筵
金獸也嫌春態淺
向風噴作綠楊煙

柳枝答

春早寒餘豈足哀
平生多難愧非才
去年二月都城裏

曾共花房帶雪來

烏鵲

烏鵲翩翩競羽毛
南飛無樹過良宵
就中管得他人事
祇與天孫倩作橋

睡起

簾卷鱗紋帳
縈紗六龍西降
樹陰斜祇應夢裏成蝴蝶
猶記南園數種花

憶錢塘江

昔年乘醉挂歸帆
隱隱前山日半銜
好是滿江流返照
水仙齊著淡紅衫

送僧遊廬山

行非為客住非家
此去廬山況不賒
要見南朝舊人物
池中惟有白蓮花

戲題荷花

昔人詩筆詠蓮花
不嫁春風早可嗟
今日倚欄添懊惱
池臺多是屬僧家

送春寄呈祖袁州

去年春盡在宜春
醉送東風淚滿巾
今日春歸倍惆悵
相逢不是去年人

早起有懷

草草西風動葛衣
呼童前啓竹間扉
山僧入定鐘聲晏
社戶多貧酒氣微
豈是客愁渾較可
祇因書卷解忘歸
盱江百里清無滓
枉屬閒人坐釣磯

南齋咏風

懊惱南窓一道風只應天配與貧窮不歸羅綺飄飄處
故入松篁冷淡中久座披襟塵榻穩半醒吹面月帷空
城邊菡萏知多少偷得清香是爾功

殘葉

一樹摧殘拾作薪欄邊為汝最傷神休翻雨滴寒鳴夜
曾抱花枝暖過春影裏有情惟日月愁邊無主足泥塵
上陽宮女多詩思莫寄人間取次人

早夏偶作

閒愁不覺過年光
強半精神是醉鄉
幾度雨來成驟熱
有時雲斷見斜陽
古人事業塵空滿
故國園林草自長
賴得南華憐我病
一篇齊物勝醫方

次韻答史太博

驛使將詩訪遠山
發函寧暇正衣冠
秦城未割難論價
燕谷纔吹已不寒
佔畢有心忘老至
惰農無罰賀恩寬
一枝數粒惟知分
豈是明時學考槃

篷屋

長簷數尺庇堂東疎漏從來只有篷日影碎如秋樹下
雨聲初似夜船中竹經蠹後多垂地笋到乾時半捲空
此處想非人所競江湖終是屬漁翁

野意亭

福塘城郭掌中窺旭日登臨到落暉誰在畫簾沽酒處
幾多鳴櫓趁潮歸晴時海色依稀辨醉後鄉愁積漸微
山鳥不知紅粉好纔聞歌板便驚飛

靈源洞

纔出塵來尚未知漸攀藤竹漸臨危伏流似是龍藏處
古樹應無春到時誰把石厓齊剡削直教雲氣當簾帷
良工畫得猶宜秘莫與凡夫肉眼窺

和王刑部遊仙都觀

尋幽西去路非賒回首紅塵事可嗟不待鸞驂并鶴駕
便分人世與仙家幾函道藏金壺墨一片秋容玉井花
還似武夷高會日凡胎猶幸醉流霞

和遊丹霞有懷歸之意

暫時來訪道家流
肯伴煙蘿滯一丘
為意長安瞻日下
欲尋蓬島向鼇頭
陶潛醉後雖眠石
王粲憂多更上樓
宣室歲餘虛席在
青山何路更重遊



石倉歷代詩選卷一百六十五